

# INUIT ATAQATIGIIT INATSISARTUNI



UKA2023/Imm. 111

## **Uunga siunnersuut:**

Nunatsinni meeqqat angerlarsimaffiup avataanut inissiisarnermut atatillugu aningaasartuutit annertuumik annertusiartuinnartunut qanoq annikillisaasinnaanerluta, immikkut ilisimasallit suleqatigiissitaq piviusorsiortunik innersuussisussatut pilersinneqarnissaat anguniarlugu Naalakkersuisut peqquneqassasut Inatsisartunut aalajangiiffigisassatut siunnersuut. Tamanna kommuunit angerlarsimaffiup avataanut inissiisarnernut aningaasartuutigisartagaannut annertusiartuinnartunut annikillisaanissaq siunertaralugu. Innersuussutit meeqqat inerikkiartornerannut, toqqissisimanerannut aammalu illersorneqarnerannut innarliissanngillat. Innersuussutit UKA 2024 nallertinnagu saqqummiunneqassapput. (Inatsisartunut Ilaasortaqaq Bjørk Lange Olsen, Demokraatit)

## **Oqaaseqaat:**

Demokraatit sinnerlugit aalajangiiffigisassatut siunnersuuteqartoq, Bjørk Lange Olsen, Inuit Ataqatigiit sinnerlugit qujaffigerusuppakkit.

Ajoraluaqisumik piviusuuvoq - nunatsinni meeqqat angerlarsimaffiup avataanut inissinneqartartut amerlavallaarujussuarput - ukiullu tamarluinnaasa aningaasartuuterpassuit meeqqat angerlarsimaffiup avataanut inissinneqartarnerat peqqutigalugu atortarpagut. Aningaasartuutillu ikiliartoratik annertusigaluttuinnartut aamma ilisimallutigu.

Assersuutigalugu misissuinerit assigiinngitsut takutippaat, kommunini tamani ulloq unnuarlu angerlarsimaffinnut inissiinermi aningaasartuutit atortakkagut

# INUIT ATAQATIGIIT INATSISARTUNI



qaffasinnerujussuusut pitsaaliuinnermut ilaqtariinnullu inissiinnermut aningaasartuutininngarnit<sup>1</sup>.

Aap, nalunngilarput meeqqat ilai angerlarsimaffiup avataanut inissineqaraangamik atugarisaat pitsaanerulersartut – taamaattorli tunggaviusumik meeqqat angajoqqaaminnit avissaartinneqartussaangillat. Taamaattumik ilaqtariinnik avissaartuutitsisarneq pinaveersaartikkumallugu annertuumik suli suliassaqarpugut.

Siusissukkut iliuuseqartarnissarput pikkoriffiginerusariaqarparput, tassuunakkut atugarliornermik, sumiginnarneqarnermik innarlerneqarnermillu ersiutit sapinngisamik siusinnerpaamik paasineqarsinnaaqullugit. Taamaattumik atorfillit pikkorissarnissaat kiisalu sulinermi periutsit pitsanngorsartuarnissaat pisariaqarluinnarpoq.

Meeqqat inatsisitigut illersugaanerisa annertusarneqarnissaat – pingaartumillu meeqqanut tunggasuni sulianik suliarinninnerni meeqqat isumaat aallaavigalugit ingerlanneqartarnissaat pitsaanerusumik qulakkeerneqartalissappat - pisariaqarluinnarpoq naalakkersuisut kommunillu qanimut suleqatigiinnerusariaqarnerat – aamma kommunit isumaginninnermullu aqutsisoqarfiup akornanni. Meeqqat inuusuttullu pillugit suliassaqarfimmi kommunini sullissinerup ukkatarineqarnerunissaa, nalunaaruteqartoqarnermilu oqartussat sukkanerujussuarmik qisuariarsinnaalernissaat minngerunngitsumillu meeqqat angerlarsimaffiup avataanut inissinneqartartut pillugit suli atuat inatsisit atuuttut malillugit suliarineqartarnissaat qulakkeerumallugu – suli annertuumik suliassaqarpugut. Taamaattumik Naalakkersuisut tamannarpiaq pillugu kommunit tamarmik suleqatigalugit suliaqarfiit akimorlugit suleqatigiissitamik pilersitsisimmamata

---

<sup>1</sup> (Pedersen et al., 2016: s. 42.)

# INUIT ATAQATIGIIT INATSIARTUNI



neriulluarfigaarput.

Illoqarfinni nunaqarfinnilu meeqqat inuusuttullu atugarliortut suli amerlanerusut ikiorneqarsinnaajumallugit neqeroorutit amerlinissaat pisariaqarluinnarpoq. Meeqqat inuusuttullu angerlarsimaffimmiinnarnissaannut, taamaasillutillu ulloq unnuarlu paaqqinnittarfimmut inissinnissaasa pinngitsoortinnissaannut periarfissaat annertusartariaqarput. Inuit Ataqatigiinniit nuannaarutigeqaarput meeqqanut tunngatillugu angalasartoqatigiit nutaat 4-mat pilersinneqassasut Naalakkersuisut siunnersuutigimmassuk. Suliniummut neriulluarpuqut – aamma ilaqtariinnik avissaartuutitsisarnerit pinaveersaartinneqarnissaat eqqarsaatigalugu.

Angajoqqaat immikkut ikorfartortariallit ikiorsissallugit pikkorinnerusariaqarpugut. Pitsaaliuineq katsorsaanerlu aallaaviusariaqarput, angerlarsimaffiullu avataanut inissiineq tunngaviusumik tassaasariaqarpoq periarfissatut kingullerpaatut atorneqartartussaq. Taamaattumik angajoqqaat immikkut ikorfartortariallit meeqqaminnut isumassuisinnaaleqqinnissaannik – meeqqallu toqqissisimasumik angerlarsimaffeqaqqilernissaannut anguniagaqartunik pitsanngorsaasariaqarpugut. Taamaattumik Inuit Ataqatigiinniit isumaqarpugut ilaqtariinnik paarsisartussarsiornissap pitsanngorsarnissaa pisariaqarluinnartoq – minnerunngitsumik ilaqtariinnut inissiiviusartunut suliassaqarfiup nukiittorsarnissaa eqqarsaatigalugu. Naalakkersuisut aningaasanut inatsisissatut siunnersummi tamannarpiaq pillugu nukittorsaasoqarnissaa anguniarmassuk Inuit Ataqatigiinniit tapersorsorparput.

Meeqqat angerlarsimaffiup avataanut inissinneqartarnerat pinaveersaartinniarlugu iliuitsit arlallit ingerlanneqarput. Suliniutit

# INUIT ATAQATIGIIT INATSISARTUNI



neriulluarfigaagut – kisianni aamma nassuerutigisariaqarparput suli  
suliassarput tamatta annertoqimmat.

Meeqqat angerlarsimaffiup avataanut inissinneqartarnerat peqqutigalugu  
anigaasartuutit qaffakkaluttuinnartut annikillisarneqarnissaat siunertaralugu  
immikkut ilisimasallit atorlugit innersuussutissanik suliaqartoqassasoq maanna  
siunnersuuteqartoqarpoq.

Innersuussutit meeqqat inerikkiartornerannut, toqqissisimanerannut aammalu  
illersorneqarnerannut innarliissanngitsut naqissuserneqarportaaq.

Siunnersuummi annertunerusumik anigaasartuutit annikillisarneqarnissaat  
eqqarsaatigalugu qanoq siunnersuuteqartup nammineerluni tamannarpiaq  
pillugu takorluugaqarnerasoq saqqummiutinngilaa.

Eqqaamasariaqarparput meeqqanik angerlarsimaffiup avataanut inissiisarnerit  
pillugit misissuinerit amerlasuut pigereeratsigit.

Assersuutigalugu nunatsinni ulloq unnuarlu paaqqinnittarfiit pillugit  
qulaajaasoqaaqqammerpoq<sup>2</sup>.

Qulaajaanerup ilaatigut uppersarpaa paaqqinnittarfinni meeqqat ulluinnarni  
unammilligassaannut, perorsaanerup pitsaassusaata akeqartitsinerullu  
imminnut pitsaasumik ataqatigiinnerannik takussutissaqartoq. Taamaattumik  
paaqqinnittarfiit arlaqartut allanut sanilliullutik annertuumik anigaasarpassuit  
atunngikkaluarlugit tunniussaqaartartut oqaatigineqarpoq. Allalli akerlianik  
akisuutut oqaatigineqarput, sullitaat aammalu perorsaanermik  
suliaqarnerminni tunniussinnaasaasa pitsaassusaat isigissagaanni.

---

<sup>2</sup> Kalaallit Nunaanni ulloq unnuarlu paaqqinnittarfiit pillugit qulaajaaneq © VIVE aamma  
allaaserinnittut, 2020

# INUIT ATAQATIGIIT INATSISARTUNI



Ilaqutariinnut paarsisartunut suliassaqarfik pillugu qulaajaaneq<sup>3</sup>  
paasissutissanik imartuunik aammattaaq peqarpoq.

Qulaajaanermi naqissuserneqarpoq ilaqutariit paarsisartut pillugit suliniutit  
pitsanngorsaataasussat iluatsissinnaappata, taava ulloq unnuarlu  
paaqqinnittarfinnut aningaasaliissutit ilaqutariinnut paarsisartunut  
nuunneqarsinnaapput, taamaammallu aningaasaqarnikkut periarfissat  
atorluarneqarsinnaasut piulissallutik, tassami ulloq unnuarlu  
paaqqinnittarfinnut inissiineq ilaqutariinni paarsisartuni inissiinermut  
naleqqiullugu akisunipilussuummat.

Taamaammat qulaajaanerit annertuut – paasissutissarpassuarnik imallit –  
aamma meeqqat angerlarsimaffiup avataanut inissinneqartarnerat  
peqqutigalugu aningaasartuutit qaffakkaluttuinnartut annikillisarumallugit  
iliuusissatut sakkussaalluarsinnaasut pillugit ataatsimiitsitaliami  
susassaqartumi itinerusumik eqqartorneqarnissaat Inuit Ataqatigiinniit  
kissaatigaarput.

Aap, suliniutit amerlasuut ingerlapput – aamma qulaajaasarnerni paasisat  
malitsigisaanilu siunnersuutit eqqarsaatigalugit – taamaattorli inatsisartuni  
qinigaatitat partiillu akornanni oqaloqatigiinnerit annertunerusariaqartut Inuit  
Ataqatigiinniit isumaqarpugut – minnerunngitsumik aamma matumani  
sammisarput eqqarsaatigalugu.

Taamaattumik siunnersuut ataatsimiitsitalimut susassaqartumut  
suliassanngortinneqarnissaa innersuupparput.

---

<sup>3</sup> Kalaallit Nunaanni ilaqutariinnut paarsisartunut suliassaqarfik pillugu qulaajaaneq  
© VIVE aamma atuakkiortut, 2021

# INUIT ATAQATIGIIT INATSIARTUNI



Tamatta akisussaaqatigiikkatta – partiit tamatta pinnaassutiginagu  
pisuutittaassutiginagulu suleqatigiissutigisariaqaratsigu – aamma  
ukiorpassuarni inerneqartunik attassinnaasatsinnillu aalajangersaassagutta.

MIO-kkut oqariartuutaat tusaavaput aamma isumaqatigilluinnarparput –  
taamaattumik una siunnersuut oqallisigitillugu – meeqqat atugarliortut  
isaanniit isigalugu oqallisigitigu – aningaasartuutit pingaarnertut  
aallaaviginatigit – meeqqalli pisariaqartitaat aallaavigalugit. Tassa partiit  
tamatta suleqatigiissutissarput pingaarnerpaaq.